

Programa pa elekshon 2019 - 2023

“Ban Pone Boneiru Promé”

Partido ” 1 Union Pa Pueblo” a ser fundá pa e lider polítiko **Aljano Emerenciana** ku e vishon i mishon pa reskatá Boneiru i su Pueblo for di e status aktual di “ BIJZONDERE GEMEENTE ” i pa medio di e elekshon binidero, duna Boneiru su propio gobernashon kompletu, segun resolushon 1541 i 2625 di Asamblea General di Nashonnan Uni manera fórmula den artíkulo 2 di Manifesto di Nashonnan Uni.

Esaki ta loke tur pueblo tin derechi riba dje.

Na 2015 e pueblo di Boneiru a duna di konosé kaba, pa medio di un referèndem, ku e Status aktual ku Hulanda a imponé riba dje, **NO** ta lokual el a pidi i **NO** ta lokual e ta deseá tampoko.

Pa korona obra djis un par di luna pasá e mandatarionan ku pueblo a skohe pa atendé nan interes den e gobièrnu lokal di Boneiru, a entregá Boneiru kompletamente den man di Hulanda, ora nan a firma e “ bestuursakkoord ” i asina kaba di bende, tantu pais komo su pueblo ku e mesun kolonisadó hulandes.

Ku e akto aki di nos propio polítikonan, a bira kla pa e pueblo di Boneiru ku awor si ta basta.

P’esei,

1 Union pa Pueblo a lanta ku e solo meta pa duna Boneiru i su pueblo bèk, lokual nan tin derechi riba dje, esta: **Un propio gobernashon kompletu, manehá i dirigí pa Boneiru su propio pueblo boneriano.**

1 Union pa Pueblo ta konvensí ku, si e pueblo di Boneiru, hala mara huntu, tuma posishon i lanta lucha pa su derechi i futuro di su yunan, despues di 20 di mart, Nos, komo un Pueblo Uni, lo lanta para, halsa nos bos huntu i kanta: den bon harmonia:

Ningun poder no por kita e afekto

Ku nos ta sinti p’e isla di nos

Maske chikitu ku su defekto

Nos ta stimele, Ariba tur kos!!!!

Partido 1 Union Pa Pueblo su ideologia, vishon i mishon:

Ideologia:

Boneiru mester ser dirigí pa yunan di tera ku konosé e kultura i kustumbernan di nan pueblo.

Vishon:

Sali for di “ Openbare Lichaam ” di Hulanda, i bira un Asosashon Liber, konforme resolushon 1541 di Asamblea General di Nashonnan Uni.
Nos ke tuma nos responsabilidat públiko kompletu den nos mes man.

Mishon:

Eliminá tur manifestashon di kolonialismo (p.e. bestuursakkoord) den gobernashon di Boneiru konforme resolushon 1514 di Asamblea General di Nashonnan Uni.

1.GOBERNASHON: STRUKTURA ESTATAL

1 Union Pa Pueblo, ta di konvikshon ku Boneiru awor mester tuma un posishon serio den e status polítiko ku nan mester skohe.

1 Union Pa Pueblo ta skohe pa Asosasion Liber ku ta un di e 4 opshonnan apunta pa Nashonnan Uní.

- OUTORIDAT KOMPLETU PA BONEIRU
(KU ENFASIS RIBA TERENO DI IMIGRASHON).**

2. EKONOMIA

- 1 Union Pa Pueblo su prioridat ta pa yu di tera benefisiá di nos ekonomia.
- Mester stimulá e Boneriano pa lanta su mes negoshi i pa partisipá komo empresario.
- Krea pilánan ekonómiko nobo ku ta benefisiá Boneiru i ku ta pas den e plan di desaroyo pa Boneiru.
- Drecha e atministrashon gubernamental i e klima di invershon, pa asina atraé invershonistanan nobo for di rònt mundu.
Drecha infrastruktura aéreo i marítimo pa hasi Boneiru aksesibel pa Caribe, Latino Amérika i otro paisnan rònt mundu.
- Introdusí “openbare dienstverplichting” i baha airport tax pa stimulá mas tráfiiko aéreo entre Kòrsou, Aruba i Boneiru.
- Introdusí transporte públiko barata.
- Supsidio di hür pa nos hendenan di ménos rekurso.
- Krea kondishonnan favorabel pa baha preis di awa i koriente.
- Kombertí Boneiru den un punto di distribushon regional di karga.
- Stimulá e-commerce dor di promové e nòmber Boneiru riba Internet.
- Hasi Boneiru miembro di organisashonnan regional p.e. Caricom .

3. INFRASTRUKTURA

- Traha riba un infrastruktura “ECO-FRIENDLY” pa Boneiru.
- Konsiderando ku e industria turístiko ta un di e pilánan importante pa nos ekonomia, mester adaptá e infrastruktura i servisio turístiko pa atraé mas turista.
- Hasi e pir aktual un megapir pa por akapará mas barku di turista.
- Hasi Boneiru mas atraktivo pa turismo.
- Drecha tur kamindanan, inkluso kamindanan di kunuku.

4. ENTRADA MÍNIMO

Rapòrtnan ta indikando ku pobresa ta oumentando na Boneiru i ku e sueldo mínimo no ta alkansá pa kubri tur e gastunan komun i koriente.

- Mester yega na un entrada realístiko, kaminda e siudadano por biba riba un nivel akseptabel. Esaki mester sosodé konhuntamente ku doñonan di trabou i sindikato.
- Hisa sueldo mínimo gradualmente te na un nivel di bida akseptabel.
- Revisá lei di atmishon i ekspulshon.
- Subi penshon di behes.
- Bini ku programanan pa saneamentu di debe pa Bonerianonan.

5. DESAROYO SOCIAL

Situashon sosial a deteriorá den e último añanan na Boneiru. Riba tereno di deporte pa nos hóbennan, no tin plaka. Tur hende sa ku nos hóbennan ta limitá den rekreashon i aktividatnan sosial. 1 Union Pa Pueblo tin esaki haltu den su bandera.

- Mester bini ku aktividatnan deportivo, drecha kanchanan di deporte, krea aktividatnan sosial i kultural pa nos hóbennan.
- Traha fasilidat pa deporte motorisá (e.o. dragrace).
- Hasi un estudio pa ku alimentashon di hóbennan na skol.
- Hasi un estudio kon pa yuda e hóbennan ku kaba skol haña trabou.

6. ENSEÑANSA

Adaptá enseñansa na nesesidat di nos pueblo i no manera e ta awor. Enseñansa di fundeshi mester sirbi pa eduká e mucha boneriano. Siensia lingwístiko a proba ku pa un mucha progresá den su estudio, su alfabetisashon mester ta den su idioma materno.

- Papiamentu mester bira idioma di instrukshon.
- Den nos skolnan nos mester introdusí lèsnan síviko, digitalisashon mester drenta enseñansa fo'i fundeshi te ku skol sekundario.
- Skol di fishi mester bini bek.

7. SALUBRIDAT

Servisio di kuido a bai atras, spesialmente di nos grandinan.

- Mester krea un mihó sistema di duna informashon pa ku kuido.

- Mester hasi un investigashon riba e sistema di funshoná di Mariadal i Zorg Verzekerings Kantoor (ZVK).
- Mester halsa kapasidat i nivel di kuido di Mariadal.

8. IMIGRASHON:

- E lei di imigrashon mester ser kambiá. Boneiru mester duna posibilidat pa personanan riba 40 aña por drenta pa presta labor ora tin skarsedat. Semper teniendo kuenta ku e yu di tera tin preferensha.
- Maneho di imigrashon mester ta den man di e Boneriano..
- Kita tur opstákulo inhustu (manera tarifanan muchu haltu) pa imigrante reuní ku nan famia.

9. KADASTER I DOMEINBEHEER

- Prepará sufisiente tereno (na midi) pa duna na erfpacht.
- Revisá e prosedura di verkaveling di tereno i petishon pa tereno di erfpacht.
- Na kosta ta akseptá proyekto solamente, si ta respetá e prinsipio ku e playa hinter ta keda públiko. Apliká art 1, insiso 2, di tratadonan Vesc i Bupo di NU pa rekobrá e playanan ku ta den man priva.
- Baha grondbelasting ku despues di 10-10-10 a subi drástikamente.

10. INDUSTRIA

- Baha import-tax pa empresarionan.
- Promové industria di agrikultura.
- Promové industria di peska.
- Promové establesementu di industria hi-tech.
- Go green: industria solar, bientu, vehíkulonan eléktriko i otronan..